



UPA 2017/102
Nuuk, 20.04.2017
Ane Hansen

Naalakkersuisut peqquneqarneqarnissaannik Inatsisartut aalajangiiffigisassaattut siunersuut, inuussutissat pillugit nalerassamik anguniagassamillu siunnerfiliineq, nerisassanik peqqinnartunik assigiinngisitaartunillu innuttaasut nerisaqarsinnaalernissaat pillugu misissuinermik suliaqaqqullugit. Misissuinerup ilanngutissavaa Kalaaliminerit tunisassiarineqarneranni akitigut apparsarneqarsinnaanerit pillugu suliniutaasinnaasut qulaajarneqarnissaat.

(Inatsisartunut ilaasortaq Vivian Motzfeldt, Siumut)

Siullermik Inatsisartunut ilaasortaq Vivian Motzfeldt qutsavigerusupparput Inuit Ataqatigiit naleqartitatsinnut pingartitatsinnullu qanittuararsuarmik oqaluuserisassamik soqutigintumik qaqitsimmat.

Inuit Ataqatigiinni naleqartitatta angorusutattalu pingarnerit ilaagaat nunatta pissarititaanik imminut pilersornitta ersarinnerulernissaa. Nunarujussuarput inuussutissanik peqqinnartorsuarnik atorluarnerusinnaasatsinnillu ulikkarpog, nerisaqarfiusuni, neriniartarfinni, pisiniarfinilu suli annerujussurmik takussaanagerusinnaasunik, aamma tamatigornerusumik nunatta iluani nunattalu avataanut tunisassiarineqarsinnaasunik.

Naalakkersuisut isumaqatigaagut akisussuteqaamminni ima paasisarialimmik oqarmata nuna tamakkerlugu aamma kommunit innuttaasullu ilangullugit sallerasaariaqartut nunatta pissarititaanik tamalaanik atuilluarnissamat.

2004-mi Naalakkersuisut Inuusutissat pillugit naalakkersuinikkut nassuiaat imartorujussuaq nunattalu pissarititaanik atorluanerunissamik siunertalik saqqummiuppaat. Nalunaarusiaq taanna pitsaasunik imaqarpoq anguniagaqarlunilu, malitseqartinneqarnerali pitsaanagerusinnaajuannavoq. 2004-miit maannamut nunatta pissarisitaanik tunisassiorneq niuveruteqarnerlu pitsaanagerulersimapput, tunisassiorfiit nunatta iluani niuvernerninni kaaviartitaat annertusisimapput, pisiniarfinilu pisiassat akornanni nioqutissiat nunatsinnersut initunerulaalersimapput, kommunit ilaanni ajorisassaangitsumik nunatta pissarititaanik kommunit suliffeqarfiutaani nerisaqarfiutigisuni atuneq pitsaasumik ineriartorpoq sulili nuna tamakkerlugu pitsaanagerusumik angusaqartoqarsinnaavoq.

Inuit Ataqatigiinnit isumaqarpugut pisortat suliffeqarfiutaat sallerasaariaqartut nunatta pissarititaanik peqqinnartunik nerisaqartitsinermi. Namminersorlutik

oqartussat suliffeqarfiutiminni politikikkut ersarissumik anguniagaqartariaqarput, suliffeqarfinni nerisaqartitsinermi nunatta pissarititaanik atuinerulernissamut napparsimaveqarfinni, ilinniarfinni suliffeqarfinnilu tamani.

Kommunit suliffeqarfiutiminni nerisaqartitsinermi taamatorluinnaq ersarissumik anguniagaqartariaqarput, meeqqerivinni, meeqqat atuarfiini, utoqqaat illuini suliffeqarfinnilu tamani nerisaqarfiutigisuni.

Kommunit ilaqarput suliffeqarfiutiminni pitsaasunik peqqinnartunik nunattalu pissarititaanik atuiluarnissamik siuarsimasutut oqaatigineqarsinnaasunik, sorlu maani Kommuneqarfik Sermersuumi meeqqat atuarfiisa ilaat Hans Lyngep atuarfiani tamanna takuneqarsinnaasoq, aamma Kommune Kujallermi nunatta pissarititaanik atuinissartik pingartittaraat takusarparput, kommunit sinneri ersarinnerusumik aamma malinnaasariaqarput.

Taamatut inassuteqarnissaq pisariaqavippoq ukiunimi kingullerni malunnartumik piniarnermik inuutissarsiutillit sukkasuumik ikiliartorput, nunatta pisarititaanik piniussisoqartuarnissarput siunertaralugu piniartutut inuutissarsiornerup pilerinarsarneqarnissaa inuutissarsiutitullu inuussutigineqartuannarnissaa Naalakkersuisut ilangullugu inatsisiliornikkut aqquattissiuuttariaqarpaat.

Naalakkersuisut aamma inakkusunnarput tappinneroqqullugit pisortat suliffeqarfiutaani suliffeqarfinnilu namminersortun, nunatta pisarititaanik atuilluartunik nerisaqartitsisunik. Isumassarsialatsiasinnaavoq aamma ukiut tamaasa nunatta pissarititaanik suliffeqarfinnik nerisaqartitsilluartunik kajumissaasiisalersinnaaneq nunatta pissarititaanik inerisaaneq eqqarsaatigalugu.

Akit appasinnerulersinnaaneranut atatillugu misissorneqartariaqarpoq nunatta avataaniit eqqussukkat aqquataasa akitsuusilarnersigut nunatta iluani nioqqutissianik assartuussinerup akikillisaavigineqarsinnaanera.

Taamatut oqaaseqarluta Naalakkersuisut siunnersuummi ilaliinerminnut inassuteqataat ilalerparput, inuussutissat pillugit nalerassanik anguniagassamillu siunnerfiliornissamik siunniussaqqarneq.